

Godišnji izvještaj 2025



SOS DJEČIJA
SELA
BOSNA I HERCEGOVINA

Poštovani partneri, prijatelji i svi koji vjerujete da svako dijete zaslu-
žuje priliku,

Iza nas je godina u kojoj smo još jednom pokazali da snaga jedne
organizacije ne leži samo u njenoj tradiciji, kapacitetima ili rezulta-
tima, već u dosljednosti da ostane uz djecu, mlade i porodice onda
kada je podrška najpotrebnija. Tokom 2025. godine SOS Dječija sela
u BiH nastavila su rasti, odgovorno djelovati i otvarati nova rješenja
za izazove s kojima se suočavaju najranjiviji članovi našeg društva.



Malik Garibija
Nacionalni direktor
SOS Dječija sela u BiH

Kroz alternativnu brigu, hraniteljstvo, preventivne programe, rani rast i razvoj djece, osnaživanje
mladih i podršku zajednicama, **direktno smo obuhvatili ukupno 3.238 djece, mladih i roditelja
širog Bosne i Hercegovine.** Iza ovog broja stoje hiljade pojedinačnih priča, novih početaka i kon-
kretnih promjena u životima ljudi kojima služimo.

Ovu godinu obilježili su konkretni pomaci. Širili smo dostupnost hraniteljstva otvaranjem novih
centara podrške i povećanjem broja djece bez roditeljskog staranja o kojoj brinemo, jačali poro-
dice u riziku kako bi djeca mogla ostati u svojim biološkim porodicama, ulagali u rani rast i razvoj
djece, pružali mladima prilike za obrazovanje, zapošljavanje i samostalan život te nastavili graditi
sistem zaštite zasnovan na dostojanstvu i odgovornosti. Svaki od ovih koraka povezuje isto uvje-
renje. Promjena je moguća kada djelujemo odgovorno, stručno i zajedno.

Posebno smo ponosni što smo i u 2025. godini ostali organizacija koja ne pristaje na minimum.
Nismo birali lakši put. Birali smo put kvaliteta, standarda, razvoja i hrabrih odluka. U vremenu kada
potrebe rastu, odlučili smo dodatno širiti naš doseg i još snažnije stati uz one kojima je podrška
potrebna danas, a ne sutra.

Iza svakog broja u ovom izvještaju stoji nečiji novi početak: dijete koje je dobilo priliku da raste u
porodičnom okruženju, mlada osoba koja je pronašla posao, roditelj koji je dobio snagu da sačuva
porodicu. To su rezultati koji daju smisao svemu što radimo.

Ništa od toga ne bismo mogli učiniti sami i zato se najiskrenije zahvaljujemo partnerima, instituci-
jama, donatorima i svim prijateljima djece i naše organizacije koji svojim povjerenjem omogućava-
ju da budemo tamo gdje je najvažnije. Najveću zahvalnost dugujemo djeci, mladima i porodicama
koji nas podsjećaju zašto moramo biti bolji, hrabriji i odlučniji.

Mnogo smo uradili, ali potrebe djece kojima treba porodica i pomoć su i dalje ogromne. Pred
nama su novi izazovi, ali i nove prilike. U njih ulazimo sa iskustvom, jasnom vizijom i uvjerenjem da
Bosna i Hercegovina može biti zemlja u kojoj nijedno dijete nije samo, nijedna porodica nije zabo-
ravljena, a nijedan mladi čovjek bez šanse.

S poštovanjem,

Malik Garibija
Nacionalni direktor
SOS Dječija sela u BiH

Alternativna briga

Porodični oblik brige: SOS porodice i samostalan život uz podršku

U SOS Dječijem selu Sarajevo i Gračanica tokom 2025. godine nastavili smo pružati stabilno i podržavajuće porodično okruženje djeci i mladima bez adekvatne roditeljske brige.

Kroz model alternativne brige djeci i mladima omogućeno je odrastanje u atmosferi, pripadnosti i podrške, uz individualiziran pristup njihovom razvoju, obrazovanju i osamostaljivanju.

Tokom godine aktivno je djelovalo 19 SOS porodica, kroz koje smo pružili brigu i podršku za ukupno 108 djece i mladu osobu. Istovremeno, kroz program samostalnog života uz podršku bilo je uključeno 32 mlade osobe, među kojima 5 studenata, kojima smo pružali podršku u procesu obrazovanja, zapošljavanja i tranzicije ka samostalnom životu.

Kroz kontinuirano unapređenje modela brige nastavili smo proces transformacije usmjeren ka kvalitetnijim uslugama, održivosti sistema i jačanju integracije djece i mladih u lokalnu zajednicu. Ovakav pristup doprinosi socijalnoj uključenosti, razvoju samostalnosti i osjećaju pripadnosti zajednici.

Obrazovanje i osnaživanje mladih

Obrazovni razvoj djece i mladih ostao je jedan od naših ključnih prioriteta. Sva djeca uspješno su završila školsku godinu. Dvoje djece upisano je u prvi razred osnovne škole, jedna mlada osoba upisala je srednju školu, dok je šest mladih uspješno završilo srednjoškolsko obrazovanje.

Tri mlade osobe započele su studij, dok su ostali studenti uspješno nastavili svoje fakultetsko obrazovanje. Posebno ističemo da su četiri mlade osobe tokom godine pronašle zaposlenje i započele samostalniji životni put, što potvrđuje važnost dugoročne podrške mladima u tranziciji ka nezavisnosti.



108
djece i mladih

19
SOS porodica

Zdrav razvoj i aktivno odrastanje

Djeca i mladi tokom godine bili su uključeni u različite sportske, rekreativne i kreativne aktivnosti u skladu sa svojim interesima i talentima.

Učestvovali su u fudbalu, košarci, odbojci, rukometu, plivanju, karateu, taekwondou, boksu, folkloru i plesnim aktivnostima, dramskim i likovnim sekcijama te pohađanjem nastave u muzičkoj školi. Kroz sport i grupne aktivnosti razvijaju samopouzdanje, disciplinu, timski duh, zdrave navike i osjećaj pripadnosti vršnjačkim grupama i zajednici.



Kroz sport i grupne aktivnosti razvijaju samopouzdanje disciplinu, timski duh, zdrave navike

Putovanja, razmjene i nova iskustva

Tokom 2025. godine organizovana su brojna rekreativna, edukativna i međunarodna putovanja, odmori i razmjene, koji su značajno doprinijeli razvoju djece i mladih. Djeca su ljetovala u Drveniku, Vodicama, Neumu i Caldonazzu, dok su kroz projekte i studijske posjete boravila u Sloveniji, Češkoj, Poljskoj i Hrvatskoj, te učestvovala u međunarodnom mirovnom projektu „Mirno more“ na Jadranu.

Kroz saradnju sa partnerima organizovane su i posjete lokalnim destinacijama, uključujući SRCE Ajdinovići i Ski Centar Ravna Planina, gdje su djeca i mladi imali priliku učiti o prirodnim bogatstvima Bosne i Hercegovine i provoditi vrijeme u zajedničkim aktivnostima.

Ova iskustva omogućila su djeci i mladima da prošire znanja i vidike, upoznaju vršnjake iz različitih dijelova svijeta, te razvijaju samostalnost, interkulturalne kompetencije, toleranciju i otvorenost prema različitostima. Istovremeno, zajedničke aktivnosti doprinijele su jačanju prijateljstava i unapređenju socijalnih vještina.

Glas djece i mladih

Dječiji parlament i Parlament mladih bili su veoma aktivni tokom cijele 2025. godine. Djeca i mladi učestvovali su u brojnim edukacijama o prevenciji nasilja, rodnoj ravnopravnosti, seksualnom i reproduktivnom zdravlju, kao i u obilježavanju važnih međunarodnih datuma posvećenih pravima djece, prijateljstvu, miru i volontiranju.

Takođe, krajem godine uzeli su učešće u obilježavanju globalne kampanje „16 dana aktivizma protiv rodno zasnovanog nasilja“, koja je održana u Hotelu Terme Ozren.

Kroz ove aktivnosti nastavlja se kontinuirano osnaživanje djece i mladih da aktivno učestvuju u donošenju odluka koje se tiču njihovih života i budućnosti.



Kratki pregled rezultata u brojkama SOS Dječijeg sela u BiH u 2025. godini

19

SOS porodica

108

djece i mladih u
alternativnoj brizi

4

mladih pronašlo
zaposlenje

5

studentata

6

mladih završilo
srednju školu

2

mladih upisalo
fakultet

32

mladih u programu
samostalnog života
uz podršku

100%

djece uspješno
završilo školsku
godinu

Svi SOS roditelji završili PRIDE edukaciju.

SOS Centri za podršku hraniteljskim porodicama

Porodični oblik brige: SOS porodice i samostalan život uz podršku

Jačanje hraniteljstva i razvoj porodične brige

Tokom 2025. godine SOS Dječija sela u Bosni i Hercegovini nastavila su snažno razvijati hraniteljstvo kao jedan od najkvalitetnijih oblika alternativne brige za djecu bez adekvatne roditeljske brige. Kroz rad SOS Centara za podršku hraniteljskim porodicama djeci je omogućeno odrastanje u stabilnom, podsticajnom i brižnom porodičnom okruženju, uz individualiziranu podršku njihovom razvoju, obrazovanju i emocionalnom osnaživanju.

Naš pristup usmjeren je na jačanje kapaciteta hraniteljskih porodica kroz stručnu, savjetodavnu, psihosocijalnu i materijalnu podršku, kako bi djeca imala priliku razvijati svoje potencijale u porodičnom okruženju. Istovremeno doprinosimo procesu deinstitucionalizacije, transformacije i unapređenju sistema zaštite djece u Bosni i Hercegovini.



Ostvareni rezultati u 2025. godini

Tokom godine kroz program hraniteljstva podržali smo ukupno 64 dijete i 12 mladih osoba, smještene u 42 hraniteljske porodice. Ovi podaci potvrđuju rast povjerenja u hraniteljstvo kao održiv i human model brige, ali i sve veći značaj stručne podrške porodicama koje preuzimaju ovu važnu društvenu ulogu.

Rezultati evaluacija provedenih među korisnicima pokazuju izuzetno visok nivo zadovoljstva kvalitetom usluga. Sve porodice su iskazale zadovoljstvo ili veliko zadovoljstvo pruženom podrškom, dok nije zabilježen nijedan odgovor koji ukazuje na nezadovoljstvo. Posebno su istaknuti dostupnost stručnog tima, redovne kućne posjete, kvalitet savjetodavnog rada te korisnost edukativnih aktivnosti.



Ukupno

64

dijete i

12

mladih osoba

Podrška porodicama koja daje rezultate

Tokom 2025. godine hraniteljskim porodicama pružena je kontinuirana podrška kroz individualna savjetovanja, grupni rad, psihološku pomoć, edukacije, terenske posjete te materijalnu podršku usmjerenu na potrebe djece i porodica. Ovakav integrisani pristup doprinio je stabilnosti smještaja djece, jačanju roditeljskih kompetencija hranitelja i kvalitetnijem svakodnevnom funkcionisanju porodica.

Hranitelji su SOS Centre prepoznali kao partnere koji razumije njihove izazove i pruža pravovremenu podršku, dok su grupni susreti i radionice dodatno doprinijeli razmjeni iskustava, osnaživanju i međusobnom povezivanju porodica.





Kratki pregled rezultata u brojkama SOS Dječijeg sela u BiH u 2025. godini

64

djece u
hraniteljstvu

12

mladih osoba
u hraniteljstvu

42

hraniteljske
porodice

4

uspostavljena SOS
Centra otvorena u
2025. Godini

Strateško širenje podrške u 2025. godini

Tokom 2025. godine SOS Dječija sela u Bosni i Hercegovini nastavila su snažno razvijati hraniteljstvo kao jedan od najkvalitetnijih oblika alternativne brige za djecu bez adekvatne roditeljske brige. Kroz rad SOS Centara za podršku hraniteljskim porodicama djeci je omogućeno odrastanje u stabilnom, podsticajnom i brižnom porodičnom okruženju, uz individualiziranu podršku njihovom razvoju, obrazovanju i emocionalnom osnaživanju.

Naš pristup usmjeren je na jačanje kapaciteta hraniteljskih porodica kroz stručnu, savjetodavnu, psihosocijalnu i materijalnu podršku, kako bi djeca imala priliku razvijati svoje potencijale u porodičnom okruženju. Istovremeno doprinosimo procesu deinstitucionalizacije, transformacije i unapređenju sistema zaštite djece u Bosni i Hercegovini.

Pregled plana u brojkama za 2026.

200+

hraniteljskih
porodica obuhvaćeno
u narednom periodu

300+

djece obuhvaćeno
u narednom
periodu

Prevenција

Jačamo porodice.

Otvaramo prilike.

Mijenjamo tokove života.

Prevenција je jedan od najvažnijih stubova djelovanja SOS Dječijih sela u BiH, jer najveće i najtrajnije promjene nastaju onda kada reagujemo na vrijeme.

Kada osnažimo porodicu prije nego što kriza ugrozi odnose i stabilnost doma, kada podržimo roditelje prije gubitka kapaciteta za brigu o djeci, kada mladima otvorimo priliku prije dugotrajne nezaposlenosti i kada razvojne potrebe djeteta prepoznamo u najranijoj dobi – tada štitimo djetinjstvo, jačamo zajednice i stvaramo dugoročni društveni učinak.

Tokom 2025. godine preventivni programi SOS Dječijih sela u BiH nastavili su rasti po obimu, kvaliteti i doseg. Kroz programe jačanja porodica, zapošljivosti mladih, razvoja kompetencija za tržište rada budućnosti, ranog rasta i razvoja djece te humanitarnog odgovora u kriznim situacijama, djelovali smo tamo gdje je podrška najpotrebnija – uz djecu, roditelje, mlade i zajednice koje traže novu priliku.

Naš pristup prevenciji ostaje sveobuhvatan i dugoročan: ne odgovaramo samo na posljedice problema, nego radimo na njihovim uzrocima. Zato istovremeno ulažemo u porodične odnose, roditeljske kompetencije, obrazovanje, zapošljivost, mentalno zdravlje, razvojne potencijale djece i otpornost zajednica. Upravo u tome leži snaga preventivnog djelovanja SOS Dječijih sela u BiH.

Program jačanja porodica – Sarajevo, Mostar, Gračanica

Porodica je prvo i najvažnije mjesto razvoja svakog djeteta. Zato je očuvanje porodice i jačanje njenih kapaciteta jedan od ključnih prioriteta SOS Dječijih sela u BiH. Kroz programe jačanja porodica u Sarajevu, Mostaru i Gračanici tokom 2025. godine pružili smo ciljanu i individualiziranu podršku porodicama koje su se suočavale sa siromaštvom, nezaposlenošću, narušenim odnosima, obrazovnim preprekama, zdravstvenim izazovima i drugim okolnostima koje mogu ugroziti dobrobit djece.

Rad nije bio usmjeren samo na rješavanje trenutnih poteškoća, već na izgradnju trajne stabilnosti i samostalnosti porodica. Kroz intenzivan terenski rad, redovne kućne posjete, individualna savjetovanja, grupne radionice i koordinaciju sa institucijama, porodice su dobijale podršku prilagođenu vlastitim potrebama i potencijalima. Roditelji su osnaživani u svojoj ulozi, djeca su dobijala podršku u obrazovanju i razvoju, a porodice konkretne mogućnosti da unaprijede kvalitet života i planiraju održiviju budućnost.


Tokom godine realizovane su brojne aktivnosti ekonomskog osnaživanja – od podrške kroz alat i opremu za rad, poljoprivredne resurse i druge izvore prihoda, do konkretne pomoći u zadovoljavanju osnovnih životnih potreba. Porodicama su osigurani prehrambeni i higijenski paketi, školski pribor, odjeća, lijekovi i podrška novorođenčadi. Istovremeno, kroz radionice i edukacije jačane su roditeljske kompetencije, komunikacija u porodici, svijest o dječijim pravima te sposobnost suočavanja sa svakodnevnim izazovima.

Najvažniji rezultat ostaje činjenica da su porodice, uz pravovremenu podršku SOS Dječijih sela u BiH, jačale vlastite kapacitete i djeci omogućile da nastave odrastati u porodičnom okruženju, uz ljubav, pripadnost i kontinuitet odnosa koji su ključni za njihov razvoj.



Rezultati u brojkama

167 porodica podržano	365 djece	41 mladih podržano
146 roditelja podržano	600+ kućnih posjeta realizovano	50+ radionica za roditelje i djecu

60+  porodica obuhvaćeno ekonomskim osnaživanjem



YEEP II – Kada mladi dobiju priliku, društvo dobija snagu

Program YEEP II, koji provode SOS Dječija sela u BiH, i tokom 2025. godine potvrđivao je da ulaganje u mlade predstavlja jedno od najsigurnijih ulaganja u budućnost društva. Mladi ljudi koji dolaze iz socioekonomski ranjivih kategorija često se suočavaju sa ograničenim pristupom obrazovanju, tržištu rada, profesionalnim mrežama i podršci potrebnoj za lični razvoj. Upravo zato YEEP II stvara prostor u kojem mladi mogu prepoznati vlastite potencijale i pretvoriti ih u konkretne životne rezultate. YEEP II implementiran je u Sarajevu, Mostaru, Banja Luci, Zenici i Tuzli.

Kroz strukturirane treninge životnih vještina i vještina zapošljivosti, individualni rad na razvoju, psihološku podršku, stručne obuke, praksu i povezivanje sa poslodavcima, mladi su tokom godine razvijali samopouzdanje, profesionalne ciljeve i konkretne korake ka zaposlenju. Program nije usmjeren samo na posao – već na cjelokupno osnaživanje mlade osobe da donosi odluke, planira budućnost i aktivno upravlja vlastitim životom.

Rezultati govore sami za sebe: stotine mladih unaprijedile su kompetencije, završile dodatne obuke, stekle praktično iskustvo i ostvarile zaposlenje. Posebna vrijednost programa ogleda se u tome što brojni učesnici prvi put ostvaruju stabilan prihod, ekonomsku nezavisnost i vjeru da njihova budućnost može izgledati drugačije.

YEEP II pokazuje da kada mladima damo znanje, podršku i priliku – oni stvaraju vrijednost ne samo za sebe, nego i za cijelo društvo

Rezultati u brojkama

247 mladih završilo treninge u 2025	499 mladih ukupno završilo program	1.369 individualnih razvojnih sastanaka
64 certificirane obuke završene	127 mladih prošlo praksu ili job shadowing	139 mladih zaposleno u 2025.
4 mladih poduzetnika koji su dobili grant poslaju duže od 6 mjeseci	173 	mladih ukupno ostvarilo održivo zaposlenje od početka projekta

40



članova YEEP II Klubova mladih
Sarajevo i Tuzla rade na inicijativama za
unaprijeđenje položaja mladih u BiH

FUTURE II – Kompetencije za tržište rada koje dolazi

Savremeno tržište rada mijenja se brže nego ikada prije. Nova zanimanja nastaju, digitalne kompetencije postaju standard, a praktične vještine često čine ključnu razliku između obrazovanja i zaposlenja. Upravo zato program FUTURE II, koji razvijaju SOS Dječija sela u BiH, mladima pruža priliku da uče ono što će im sutra biti potrebno.

Tokom 2025. godine FUTURE II je nastavio jačati zapošljivost mladih kroz edukacije iz oblasti umjetne inteligencije, programiranja, web dizajna, poduzetništva, robotike, digitalnih alata i profesija budućnosti. Mladi su kroz program razvijali i tzv. meke vještine – komunikaciju, timski rad, rješavanje problema, liderstvo i profesionalnu odgovornost.

Jedan od najvećih iskoraka u godini bilo je otvaranje Centra za praktične edukacije FUTURE II, razvijenog u saradnji sa Ministarstvom obrazovanja Kantona Sarajevo i tri srednje stručne škole s područja Kantona Sarajevo. Ovaj centar predstavlja primjer kako obrazovni sistem i sektor civilnog društva mogu zajednički graditi rješenja koja mladima donose direktnu korist. Već u prvim mjesecima rada učenici su pohađali praktičnu nastavu u savremeno opremljenom prostoru i sticali iskustvo relevantno za savremeno tržište rada.

FUTURE II potvrđuje da obrazovanje, kada je povezano sa realnim potrebama privrede i savremenim trendovima, postaje snažan pokretač zapošljivosti, inovacija i društvenog razvoja.

Rezultati u brojkama

593 mladih podržano	1.750+ edukativnih i razvojnih prilika	16 radionica i treninga o novim tehnologijama
155 učenika završilo praktičnu nastavu	25 mladih učestvovalo u poslovnom kampu	20 mladih posjetilo tehnološki sajam u Ljubljani.

135



učesnika događaja profesionalne orijentacije



Centar za rani rast i razvoj – Najvažnija ulaganja počinju rano

Prve godine života presudne su za cjelokupan razvoj djeteta. U tom periodu postavljaju se temelji za učenje, emocionalnu stabilnost, socijalne odnose i buduće životne ishode. Zato SOS Dječija sela u BiH kroz Centar za rani rast i razvoj ulažu upravo u period koji najviše određuje budućnost svakog djeteta.

Tokom 2025. godine Centar je pružio podršku djeci predškolskog uzrasta koja nisu bila obuhvaćena drugim organizovanim oblicima predškolskog odgoja i obrazovanja, kao i djeci sa razvojnim potrebama kojima je bila potrebna rana intervencija. Istovremeno, roditelji su dobijali znanja, savjete i podršku kako bi snažnije pratili razvoj svoje djece i kvalitetnije odgovarali na njihove potrebe.

Kroz stručne tretmane iz oblasti logopedije, psihologije, defektologije, senzorne integracije i razvojne stimulacije, djeci je omogućen kvalitetniji razvojni početak. Program je istovremeno djelovao i preventivno, jer pravovremeno prepoznavanje razvojnih odstupanja omogućava bržu reakciju i bolje dugoročne ishode.

Kroz Centar za rani rast i razvoj SOS Dječija sela u BiH djeci pružaju snažniji početak, a roditeljima podršku da sigurnije vode svoju djecu kroz najvažnije razvojne godine.

Rezultati u brojkama

503 djece uključeno u program	338 roditelja učestvovalo u edukacijama	95 djece dobilo usluge rane intervencije
290 radionica za djecu i roditelje	75 djece uključeno u logopedске tretmane	64 djece uključeno u defektološke tretmane
32 djece uključeno u neurofeedback terapiju	29  djece koristilo senzornu integraciju	

Jablanica i Konjic – Podrška zajednicama u oporavku

Nakon razornih poplava koje su pogodile Jablanicu i Konjic, SOS Dječija sela u BiH tokom 2025. godine nastavila su pružati podršku porodicama pogođenim krizom, s fokusom na djecu, roditelje i dugoročni oporavak zajednice.

Program je obuhvatio psihosocijalnu pomoć, edukacije o prevladavanju stresa i traume, materijalnu podršku te jačanje lokalnih kapaciteta za odgovor u kriznim situacijama. Posebna pažnja posvećena je djeci i mladima kojima je nakon traumatičnog iskustva bilo potrebno vratiti osjećaj rutine, pripadnosti i nade.

U Jablanici je uspostavljen prostor podrške za djecu i porodice koji je postao mjesto oporavka, učenja, igre i ponovnog povezivanja zajednice. Kroz saradnju sa lokalnim institucijama i partnerima, podrška je pružana koordinirano i u skladu sa stvarnim potrebama stanovništva.

Ovakve intervencije potvrđuju da pomoć nakon krize ne znači samo saniranje posljedica, već vraćanje nade, osnaživanje ljudi i stvaranje temelja da zajednica može krenuti naprijed.



Rezultati u brojkama

524 korisnika dobilo direktnu podršku	284 djece i mladih podržano	240 roditelja i staratelja podržano
154 porodice podržane	50 porodica primilo pakete hrane i higijene	40 porodica opremljeno namještajem i aparatima
74 djece dobilo školski pribor i odjeću	27 	porodica podržano ogrjevom
35 	profesionalaca prošlo edukacije	

Zaštita sigurnosti

Jačanje kulture zaštite, odgovornosti i povjerenja

Tokom 2025. godine SOS Dječija sela u BiH nastavila su sistemski jačati zaštitu sigurnosti kao jedan od ključnih prioriteta organizacije. Naš pristup zaštiti zasniva se na jasnom uvjerenju da svako dijete, mlada osoba, zaposlenik, volonter i partner ima pravo na okruženje u kojem se poštuju dostojanstvo, prava, integritet i odgovornost.

Aktivnosti tokom godine bile su usmjerene na daljnje unapređenje preventivnih mehanizama, jačanje internih kapaciteta, osiguravanje pravovremenog reagovanja u slučaju zabrinutosti te kontinuirano praćenje efikasnosti sistema zaštite. Time je safeguarding ostao sastavni dio organizacijske kulture, svakodnevnog rada i strateškog upravljanja u SOS Dječijim selima u BiH.



Naš pristup


zaštiti zasniva se na jasnom uvjerenju da svako dijete



Prevenција i upravljanje rizicima

U 2025. godini sve aktivnosti koje uključuju djecu, mlade, porodice, zaposlenike i partnere planirane su uz procjenu potencijalnih rizika i definisanje odgovarajućih mjera zaštite. Procjene rizika provedene su na nivou programa, projekata i pojedinačnih aktivnosti, čime je osigurano da specifični konteksti i potrebe korisnika budu pravovremeno prepoznati i adekvatno adresirani.

Tokom godine dodatno su unaprijeđeni mehanizmi prijavljivanja zabrinutosti kako bi bili dostupniji, razumljiviji i prilagođeniji djeci, mladima i odraslima. Posebna pažnja posvećena je sigurnom zapošljavanju, provjerama prije angažmana osoblja i saradnika, jasnom definisanju odgovornosti te usklađivanju procedura sa međunarodnim standardima zaštite.



Procjene rizika

provedene su na nivou programa, projekata i pojedinačnih aktivnosti



Edukacija i razvoj kompetencija

Kontinuirana edukacija ostala je jedan od najvažnijih alata za izgradnju snažnog sistema zaštite sigurnosti. Tokom godine zaposlenici, partneri, volonteri i saradnici prolazili su različite oblike stručnog usavršavanja usmjerene na razumijevanje politika zaštite, prepoznavanje rizika, odgovorno postupanje i pravilnu primjenu procedura.

Svim zaposlenicima dostupni su online edukativni moduli koji se koriste kao dio onboarding procesa, ali i kao alat za kontinuirano učenje i unapređenje znanja. Dodatno, edukovani su i timovi odgovorni za upravljanje incidentima, s fokusom na procjenu rizika, dokumentovanje, povjerljivost i pristup zasnovan na razumijevanju traume.

Osnaživanje djece i mladih

Zaštita je najsnažnija onda kada djeca i mladi razumiju svoja prava i znaju kome se mogu obratiti za podršku.

Tokom 2025. godine SOS Dječija sela u BiH nastavila su ulagati u edukacije prilagođene uzrastu djece i mladih, kroz koje su učili o ličnim granicama, neprihvatljivim oblicima ponašanja, sigurnoj komunikaciji i dostupnim mehanizmima podrške.

Na ovaj način djeca i mladi osnaženi su da aktivno učestvuju u vlastitoj zaštiti i doprinesu stvaranju okruženja zasnovanog na međusobnom poštovanju, odgovornosti i povjerenju.



nastavila su ulagati u edukacije prilagođene uzrastu djece i mladih

Odgovorno postupanje i kontinuirano unapređenje

Tokom godine SOS Dječija sela u BiH nastavila su jačati koordinaciju između lokalnog i nacionalnog nivoa kako bi svaki signal zabrinutosti bio tretiran odgovorno, pravovremeno i u skladu sa važećim politikama i procedurama. Saradnja sa nadležnim institucijama provedena je u svim situacijama koje su zahtijevale institucionalno postupanje.

Paralelno je proveden kontinuirani monitoring otvorenih procesa, analiza trendova i identifikacija prostora za unapređenje preventivnih mjera. Kao dodatni korak u jačanju kvaliteta sistema, realizovan je interni audit u programu SOS Dječije selo Sarajevo, čime je potvrđena funkcionalnost postojećih mehanizama i definisane preporuke za daljnji razvoj sistema zaštite.

Rezultati u brojkama

120 zaposlenika uključeno u safeguarding edukacije	86 predstavnik partnerskih organizacija obuhvaćeno treninzima	151 djece i mladih učestvovalo u edukacijama o pravima i zaštiti
59 volontera prošlo safeguarding treninge	48 zaposlenika uključeno u individualne edukacije	17 članova timova za upravljanje incidentima dodatno osnaženo

1



interni audit sistema zaštite realizovan u 2025. godini

Odjel za prikupljanje sredstava

SOS Dječija sela BiH u suradnji sa Fondacijom za zaštitu Bjelašnice, Igmana, Treskavice i kanjona Rakitnice Sarajevo, uz finansijsku podršku korporativnih partnera pokrenula je projekat Ledići - Rekonstrukcija kuće za odmor na Bjelašnici, u mjestu Ledići.

Kuća za oporavak je potpuno rekonstruisana i opremljena za udoban boravak do osam osoba tokom petodnevnog odmora. Boravak u kući bit će u potpunosti besplatan za porodice sa djecom koje su uključene u programe Organizacije – SOS porodice, SOS Hraniteljske porodice te porodice u programu Jačanja porodica. Veliki broj roditelja koji su uključeni u program Jačanja porodica naporno i dugo rade, jedva uspjevajući zaraditi novac za zadovoljavanje osnovnih potreba svoje porodice i mnogima je odmor i opuštanje nažalost samo nedostižan san. Naši su napori usmjereni ka ekonomskom osnaživanju porodica i svjesni smo da roditelji mogu osigurati ekonomsku održivost porodica samo pod uslovom da su psihološki i emocionalno stabilni i odmorni. Pružiti im mogućnost odmora i relaksacije u prirodi smatramo esencijalnim u procesu ozdravlivanja i osnaživanja svakog porodičnog sistema.

Projektom Ledići doprinosimo zdravlju i blagostanju porodica, roditelja i djece.



Rekonstrukcija
kuće za odmor



Donacije građana

Kumstvo ukupan broj mjesečnih donatora u 2025. godini je 11007. Imali smo jedan tim SOS ambasadora, s ukupno 14 SOS Ambasadora branda i jednim voditeljem.

Novi donatori regrutiraju se putem direktnog kontakta sa građanima na vanjskim trgovima i javnim površinama te u trgovačkim centrima, kao i putem interneta. Najveći broj donatora pridružio nam se kroz naš kanal direktnog kontakta. Osim privlačenja novih donatora, nastavili smo intenzivan rad na razvoju programa lojalnosti s našim postojećim redovnim donatorima u programu Kumstva. Uspostavljena je jasna struktura procesa i poziva održavanja kontakta sa standardiziranim pristupom komunikaciji sa donatorima kroz tok i ton razgovora, bilježenje i e-mail komunikaciju. Glavni alati u našem programu lojalnosti su vlastiti pozivni centar, SMS viber poruke i e-newsletteri.

Godina 2025. donijela je i prekretnicu u radu sa donatorima individualcima – aktivnosti održavanja i daljeg razvoja kanala direktnog kontakta prebačene su okvir Organizacije. Zahvaljujemo se našim partnerima iz kompanije Dekra Arbeit BH na dugogodišnjoj i izuzetno profesionalnoj saradnji tokom koje smo jako mnogo naučili i danas smo spremni na samostalan nastavak.

U svijetu prikupljanja donacija (fundraisinga), cilj je donatoru pružiti osjećaj vrijednosti, zahvalnosti te pokazati učinak donacije. Zahvaljujući podršci naših dugogodišnjih donatora, već 31 godinu uspješno živimo misiju i viziju sretnog djetinjstva. Upravo iz tog razloga naučili smo kako je ulaganje u korisničko iskustvo naših donatora od presudne važnosti za uspješne rezultate u digitalnom fundraisingu.

Kontinuirano ulažemo u dizajniranje i poboljšavanje korisničkog iskustva korisnika web stranice, što se potvrđuje kroz rast finalnih rezultata. Tokom 2025. godine kroz online kanale i našu web stranicu prikupljeno je više od 240.000 KM, te smo regrutirali 565 mjesečnih donatora. Prosječan iznos mjesečne donacije iznosio je 30 KM a već prvom uplatom novih mjesečnih donatora prikupljeno je gotovo 17.000 KM. Od kontinuiranih online kampanja, koje za cilj imaju regrutaciju redovnih mjesečnih donatora, najbolje rezultate dale su kampanje u periodima praznika. Povrat na uloženo u ovom kanalu vidjeli smo već kroz 5 mjeseci.

**DJECA.
NADA
KOJU
GAJIMO.**

Donacije kompanija

Uz vrijednu finansijsku podršku te volontersku aktivnosti kompanije Telus Digital pokrenuli smo projekat uređenja igrališta za djecu u okviru SOS Dječijeg sela u Sarajevu.

Naši partneri i prijatelji, zaposlenici kompanije Telus Digital, njih 45 kroz volonterske aktivnosti doniralo je svoje vrijeme i energiju na raščišćavanju i uljepšavanju prostora igrališta čime je omogućen siguran prostor za igru djece iz SOS porodica i zajednice.

Ponosni smo na rast donacija koje ostvarujemo saradjujući sa bosanskohercegovačkim kompanijama uprkos izazovima poslovanja, rastu troškova te nepredvidivosti tržišta. Ove godine smo uz podršku naših partnera uspjeli pokriti troškove uspostave Centra za izvrsnost u okviru SOS Dječijeg sela Gračanica, mjesta gdje se znanje umnožava i dijeli, a obrazovanje postaje ključ za dostojanstven rad i ekonomski rast.

Baza podataka kompanija o kojoj s pažnjom brinemo, omogućava nam da lako i redovno izveštavamo naše partnere donatore o našim uspjesima, izazovima, rješenjima i malim radostima kojih u našem radu ima mnogo. Kroz dvije kampanje usmjerene ka malim i srednjim preduzećima uspjeli smo prikupiti 95000 KM za potrebe obnove, održavanja i zagrijavanja porodičnih kuća u kojima žive porodice s djecom bez roditeljskog staranja.

Izuzetno smo zahvalni i ponosni na kompanije koje su sa nama godinama, koje razumiju potrebe zajednice u kojoj žive te dijele vrijednosti koje u Organizaciji njegujemo. Naši partneri razumiju i doprinose osiguravanju uslova za dostojanstven život najranjivijih kategorija našeg društva, doprinoseći tako izradnji svijeta bez siromaštva. Veliko hvala dugujemo kompanijama i udruženjima koji su uz nas godinama Bingo, Akova, Mastercard, Raiffeisen Bank, Sparkasse, Hifa, Dr. Oetker, Orbico, Holdina, AmCham, Grawe Osiguranje, Pepco, Concentrix, Imaco, Lactalis, Glovo te mnogim drugim, bez čije podrške naš rad ne bio moguć.



Zagovaranje

Tokom 2025. godine, SOS Dječija sela u BiH ostvarila su značajne rezultate u oblasti zagovaranja, razvoja hraniteljstva, unapređenja socijalnih usluga i jačanja institucionalne saradnje na lokalnom, kantonalnom i federalnom nivou. Fokus rada bio je usmjeren na sistemsku promjenu koje doprinose boljoj zaštiti djece bez roditeljskog staranja i porodica u riziku.

Jedan od najvažnijih rezultata godine predstavlja podrška Vlade Federacije BiH Zakonu o socijalnim uslugama i izmjenama Zakona o hraniteljstvu, koji su upućeni u parlamentarnu proceduru. Kroz Platformu za saradnju parlamentaraca FBiH „Glas djece bez roditeljskog staranja“ organizovana su dva velika radna sastanka sa više od 100 učesnika iz institucija, parlamenta, međunarodnih organizacija i stručne zajednice.

Fokus sastanaka bio je unapređenje sistema zaštite djece, borba protiv trgovine ljudima i osiguranje pravednijeg pristupa zdravstvenoj zaštiti za djecu bez roditeljskog staranja i djecu u hraniteljskim porodicama. Kao rezultat zagovaračkih aktivnosti, Vlada FBiH su SOS Dječija sela u BiH imenovala za člana Koordinacionog tijela za borbu protiv trgovine ljudima Federacije BiH.

U Sarajevu je organizovana i međunarodna konferencija na kojoj je prvi put u BiH predstavljena Rezolucija 2533 Vijeća Evrope o zaštiti djece od svih oblika nasilja. Konferencija je okupila više od 100 učesnika i otvorila dijalog o reformi sistema zaštite djece, razvoju hraniteljstva i jačanju porodične brige.

Saradnja sa lokalnim zajednicama rezultirala je konkretnim ulaganjima u razvoj servisa za djecu i porodice. U partnerstvu sa Općinom Centar Sarajevo otvoren je novi Centar za rani rast i razvoj, dok je sa Općinom Stari Grad Sarajevo otvoren stambeni objekat za samostalni život mladih uz podršku „Dom nade i prilike“. Dugogodišnja saradnja sa Općinom Novi Grad Sarajevo nastavljena je kroz podršku SOS porodicama i radu Centra za rani rast i razvoj, dok je saradnja sa Gradom Gračanica unaprijeđena kroz proširenje kapaciteta vrtića i razvoj Centra za izvrsnost u okviru programa SOS Dječijeg sela Gračanica.



SOS Dječija sela u BiH pružila su podršku Ministarstvu rada, socijalne politike i povratka Tuzlanskog kantona u planiranju uspostavljanja dnevnog centra za djecu s emocionalnim i ponašajnim poteškoćama. Organizovani su stručni sastanci i studijske posjete institucijama u Hrvatskoj radi razmjene iskustava i razvoja novih socijalnih usluga u TK.

U oblasti obrazovanja potpisan je Memorandum o saradnji sa Ministarstvom za odgoj i obrazovanje Kantona Sarajevo I tri tehničke srednje škole, na osnovu čega je uspostavljen SOS Centar za praktičnu nastavu u saradnji sa srednjim školama, s ciljem jačanja praktičnih znanja i zapošljivosti mladih u nastavnim programima.

Promocija hraniteljstva realizovana je kroz medijske kampanje, javne događaje i premijeru prvog bh. dokumentarnog filma o usvojenju i hraniteljstvu „Dite“, koja je okupila više od 300 zvanica. Organizovana je i panel diskusija o izazovima hraniteljstva u saradnji sa Ministarstvom zdravstva, rada i socijalne politike HNK.

Saradnja sa međunarodnim i domaćim partnerima dodatno je proširena kroz regionalne forume i zajedničke zagovaračke inicijative sa organizacijama. Tokom godine realizovano je više od 50 posjeta i sastanaka sa predstavnicima institucija, ambasada i međunarodnih organizacija, čime je dodatno osnažena institucionalna saradnja i podrška razvoju sistema alternativne brige i zaštite djece u Bosni i Hercegovini.

Tokom 2025. godine poseban fokus stavljen je na razvoj hraniteljstva. Potpisani su protokoli o saradnji sa kantonalnim ministarstvima u Kantonu Sarajevo, Tuzlanskom, Unsko-sanskom, Zeničko-dobojskom i Srednjobosanskom kantonu radi jačanja podrške hraniteljskim porodicama i uspostave SOS Centara za hraniteljstvo. Kroz saradnju sa Federalnim ministarstvom rada i socijalne politike organizovano je sedam obaveznih edukacija za gotovo 100 polaznika, nakon kojih je 50 novih hraniteljskih porodica steklo formalni status hranitelja.



Prvi

bh. dokumentarnog filma o usvojenju i hraniteljstvu „Dite“

Finansijski izvještaj


Transparentnost rada organizacije SOS Dje;ija sela u BiH ogleda se i u obavezi revidiranja finansijskih izvještaja od strane neovisne revizorske kuće. Revizija izvještaja za 2025 godinu obavljena je od strane revizorske kuće N. Consulting doo Sarajevo.

Zaključak revizije


Finansijski izvještaji pošteno prikazuju, u svim materijalnim aspektima, finansijsku poziciju organizacije na dan 31.12.2025. godine, a sve njene finansijske aktivnosti i novčani tok za 2025. godinu su u skladu sa Finansijskim priručnikom SOS Kinderdorf International i računovodstvenim standardom 1.

Ukupni prihodi u 2025

Lokalni prihodi



Prihodi 2025



Hvala

Iza svakog rezultata prikazanog u ovom izvještaju stoje ljudi koji vjeruju da promjena jeste moguća. Zato na kraju 2025. godine upućujemo iskrenu zahvalnost svima koji su bili dio misije SOS Dječijih sela u BiH.

Hvala partnerima, donatorima, institucijama, kompanijama, lokalnim zajednicama, centrima za socijalni rad i prijateljima organizacije koji su svojim povjerenjem i podrškom omogućili da budemo uz djecu, mlade i porodice onda kada je to bilo najpotrebnije. Vaša podrška pretvara solidarnost u konkretne prilike, a zajedničke vrijednosti u stvarne promjene.

Hvala SOS roditeljima, hraniteljskim porodicama, stručnim timovima, saradnicima i volonterima koji svakodnevno svojim znanjem, brigom i predanošću stvaraju okruženje u kojem djeca mogu rasti, mladi planirati budućnost, a porodice pronalaziti novu snagu.

Najveću zahvalnost dugujemo djeci, mladima i porodicama koji nam ukazuju povjerenje. Njihova hrabrost, ustrajnost i spremnost da iznova grade svoje živote podsjećaju nas zašto ovaj rad ima dubok smisao.

Svima koji su već dio ove priče hvala što zajedno s nama gradite bolje društvo. Svima koji nas tek prepoznaju, dobrodošli. Jer kada udružimo znanje, odgovornost i ljudskost, možemo učiniti još više.

Zajedno nastavljamo dalje za djecu, za porodice, za prilike koje mijenjaju budućnost.





SOS DJEČIJA
SELA
BOSNA I HERCEGOVINA

Kontakt

Telefon +387 33 465 218
Fax +387 33 465 323
Email info@sos-ds.ba
www.sos-ds.ba